

四庫全書

史部

欽定四庫全書

明名臣琬琰錄卷二十一

明 徐紘 撰

春坊贊善陳先生行狀

金 寶

先生諱濟字伯載姓陳氏常州武進縣人上世居溫之樂清代為儒家高祖號月岩為瑞安州學正有子七人其第六子曰可山者因游平江兵興不得還遂僑寓常熟之雙鳳里先生之曾大父也大父益初父貞又自常

熟遷今居母唐氏先生穎悟異常總角讀書過目輒成
誦比長勵志弗懈嘗以父命游錢唐會稽從縉紳先生
學從者載泉貨隨之貿遷比還先生以其貲之半購書
父奇之笑曰汝能盡讀耶吾弗汝惜先生自是益肆力
其間日夜務記覽聞人有異書輒假手錄成帙至於胼
指無憚勞勩如是者十餘年遂貫穿經史百家之言才
名卓然振起東南諸郡會朝廷修永樂大典大臣有言
先生者以布衣召至為都督總裁時合內外詞臣暨太

學儒生衆數千戶緒閱中抄四庫書浩瀚填委先生至
則與故少師姚公尚書鄭公祭酒學士數輩詳定凡例
區別去取莫弗允愜而六館執筆之士凡有疑難輒從
質問先生隨問響答未嘗舐滯疏抉剖析咸有源委非
口耳獵涉者可比故一時之人無不服其該博書成擢
右春坊右贊善居輔導之職十有五年小心謹慎未嘗
有分毫過差去年被命隨侍五皇孫授經凡有諮問先
生援据精詳洞究始末博而有要皇孫亦素聞先生名

深加禮重方將咨以啓沃今年夏五月某日暴中風不能言百藥弗瘳六月四日卒于寓舍年六十一前甲辰之歲某月某日其始生也配潘氏子男三人長格次棧天卒次栝女二人先生重厚修慎孝友天至事母太夫人備極色養太夫人嘗戒以無過飲終身未嘗至醉其宦遊京師也以太夫人年高不可迎養每一念至輒歛歔飲泣教篤二弟底于成立尚書公以碩德長才由給事中陞大理卿再轉而位大司馬事先生如父出鎮交

耻歲告書問往來不絕先生以其弟位六卿已復繼登
清要深懼盛滿彌自敬畏平居敦尚儉素食不兼味衣
無華綺僑寓闌闌一室蓬戶葦壁僅蔽風雨而終日危
坐手不釋卷為文章根柢經史必務理勝不事葩藻常
曰文如菽粟布帛貴有益於世不爾雖工奚益所著有
綱目集覽證誤若干卷文集若干卷藏于家病後數日
會格奉母來省病且革至是復甦瞠目視格母子以手
書太夫人安否字格對以無恙頷之出涕被面後三日

竟卒格既畢殯殮事將奉柩南還墓里之某山乃涕泣
求予狀其行實乞銘于當代立言君子以昭不朽予與
先生有同官之好而又相知義不得而辭焉謹狀

兵部尚書節愍陳公墓誌銘

曾 榮

兵部尚書昆陵陳公之死事于交趾也訃聞詔贈少保
榮祿大夫謚節愍遣官諭祭命其子樞為刑科給事中
勅工部為造墳塋厚恤其家樞既倣古具衣冠招魂與
公之夫人合葬其邑定安西鄉三橋之原乃奉禮部尚

書胡公濩所述行狀詣余泣拜請銘余嘗辱知於公而忠節事又所當書者遂不辭按狀公諱洽字叔遠姓陳氏其先浙之樂清人曾祖可山喜為湖海之遊元季客平江遭亂道梗弗得歸遂家姑蘇之常熟祖益初父以貞連世弗仕母唐氏有淑德國朝洪武中以貞自常熟徙居毘陵之武進三子皆聰穎秀異公其仲子也生洪武庚戌正月初六日自幼端重不為兒嬉甫成童已屹如老成人稍長貌奇偉長身玉立人望而敬焉與兄濟

暨弟浚同游鄉先生謝子蘭之門子蘭謂人曰陳氏兄弟才氣如此河東之薛不得專美於前矣且以遠大期之公讀書力學淹貫羣籍无工於書法弱冠用薦登朝命點軍卒過其目輒識其面且記姓名弗忘有再至輒答之叱令其去總戎懼請罪公上其事太祖皇帝嘉之賜織金鸛鵲衣一襲洪武丙子以貞戍五開以父沒去官至家時五開蠻寇竊發公匍匐將往以歸父喪或止之公不應涕泣以行其後觸瘴癘冒危險間關五千餘

里竟負骨歸葬焉未幾少保兵部尚書茹公瑞薦公可
大用遂奪情起復授文選郎中太宗皇帝入正大統之
初首陞為吏部右侍郎尋轉陞左侍郎階嘉議大夫量
才任官銓衡惟允復署地官事益有聲永樂乙酉遷大
理寺卿持法平恕民無告寃者丙戌交趾黎賊構逆朝
廷興師問罪且命公覘賊蹤跡調土兵三萬以佐總戎
者未幾黎賊就俘交趾遂平既還朝命掌春官事論功
定賞人無間言繼署冬官名譽尤振歲己丑交趾餘寇

作亂仍命英國公張輔率師往討之公實與叅贊機務
遂擒其凶渠簡定而還時北方兵動車駕親征公承命
偕英國公訓練士卒于塞外辛卯復任鎮交趾以克綏
輯其民先教化而後刑法夷人安之蠻俗為之不變而
窮陬遐裔間絃誦之聲相聞乙未還京師上嘉其功陞
兵部尚書階資善大夫丁酉仍與豐城侯李公彬同鎮
交趾兼掌二司事仁宗皇帝即位勅領交趾布政司按
察司兩司仍叅軍事賜誥命追封二代祖考皆資德大

夫正治正卿兵部尚書祖妣贈夫人母封太夫人故妻
楊氏贈夫人今上皇帝宣德改元之初蠻寇黎利勢益
張成山侯王通率師討叛公仍與叅贊是歲冬十一月
八日出師討賊公以為宜駐師石室縣之沙河以覘賊
勢主帥欲渡河而陣公反覆諭以利害且陳方畧主帥
弗聽翊旦五鼓麾兵以渡公弗能止次寧橋賊自己至
未及力戰公遂自奮馬突入賊陣欲擒其首惡身被創
甚而了無怯色既而墜馬左右扶掖公欲還營中且曰

主帥且退公何自苦如此公張目叱之曰吾受朝廷厚恩四十年報國正在今日吾豈偷生忍恥者乎衆皆潰散公奮勇持擊戈前進手殺數人知力不能支大罵自刎而死賊相視駭嘆公自筮仕即居內庭恂恂謙謹清儉寡慾忠信孝友出於天性動止語默皆有禮度獎善嫉惡尤惡諂諛親仁好賢歎尚正直於人無所毀譽而遇之必以誠性樂恬淡不事侈靡平生不畜媵妾所至惟家僮二人以給使令晚年不喜飲酒閒居沉默寡言

終日危坐人莫窺其底蘊有言兵者則曰兵凶器也古人尚德化必不得已然後用之博涉書史論至古將相忠孝之事必正顏定色英氣橫發擊節稱歎若已有之雖有邊徼經營軍旅之務稍暇即讀書自娛手未嘗釋卷也其為詩文敏捷往往皆有思致公卒之明年主帥弃城而歸交趾遂為賊所據夷人思公之遺德語及輒為之涕流嗚咽久之公卒之日享年五十有七配楊氏贈夫人子男二人長即樞次曰機女二孫男二曰勲曰

杰銘曰烈烈陳公乘時奮庸薦剡星馳一鶚橫空亦既
登朝遂膺寵澤優游清班以典封駁執喪居廬制未克
終承詔復起薦躋顯融授官郎署銓衡是職繼貳天官
厥聲籍籍黎寇叛逆命將往征公贊戎機厥功以成蠻
荒底寧爰立郡縣公乃藩方夷俗丕變既還京師上嘉
乃績乃授司馬屢加寵賜承命載行餘孽披猖負其險
固出沒跳梁主帥恣驕而不持重輕敵以戰公言弗用
寇勢益張公弗顧身力戰以斃捐軀成仁公之忠誠以

死徇國義氣英風有聲赫赫褒典薦加恩命允隆高爵
美謚用表厥忠既卹其家復官其子公其不朽有光信
史三橋之原寔允臧銘以昭之萬世流方

兵部尚書許公神道碑銘

楊 榮

汴之許州即古之潁川郡其士風端慤尚志節由是出
者莫不著明於世若今之大司馬許公其一焉公諱廓
字文趨姓許氏世居許之襄城曾大父居敬大父守誠
父忠信皆隱德弗仕母王氏公生而岐嶷賦性惇厚韶

觀之年即知務學其父遣入邑庠受經遂領洪武己卯
河南鄉薦明年試禮部弗偶入太學永樂丙戌擢錦衣
衛經歷未幾超授工科給事中復陞鴻臚寺左丞皆能
舉其職歲壬辰拜工部右侍郎時職務叢脞公悉心殫
慮以佐其長凡可惠工而利國者皆奏行之事多就緒
輿論歸焉甲午太宗皇帝親率將士往征北方命公督
運糧餉隨軍往返六閱月而士馬給足人無暴擾乙未
將營建北京命公提督神木廠事工繁而役重公益持

謹慎始終弗渝己亥以交趾人戶田賦未有定規命公
往理之公至察人心事宜與總戎豐城侯李彬掌交趾
布政司事尚書黃福等議其可否遂還朝條奏其利害
數事上皆嘉納之仁宗皇帝即位念公勤勞中外政績
有稱遷工部左侍郎授正議大夫資治尹賜誥命推恩
贈其父祖皆如公官祖妣閻氏母王氏皆為淑人皇上
嗣位知公惇實可任益隆眷待宣德庚戌秋民飢流離
者衆上以公大臣素為鄉邦所重命往撫輯之至則旌

廉黜貪勸善懲惡榜示有司弗得復有科擾禁豪右母
索取私錢凡夫匠雜役及諸采辦與積逋稅糧諸物悉
奏免焉於是民皆趨走復業戴公若父母還朝上慰勞
甚至辛亥春正月降勅獎諭陞公為行在兵部尚書復
賜誥命授資善大夫并加贈厥祖若父皆尚書祖妣及
母皆夫人公荷國厚恩方夙夜經慮以圖報而遽以疾
聞皇上賜藥命醫視疾竟不能起實宣德壬子六月十
二日距公生洪武丁巳三月辛巳得年五十有六訃聞

上深悼惜遣官賜祭命有司治墳塋給舟車歸其喪公
卿大夫皆走哭而致奠祭焉配王氏封夫人子男四長
麟獸次繼廣繼文繼武卜以某年某月某日塋公于其
鄉首山之陽其宗姪國子生昌率其幼子奉監察御史
羅亨信所狀事行詣予請銘予昔與公有同官之好弗
可辭惟公姿貌豐偉襟度夷曠具寬厚之德有通敏之
才歷事三聖薦沐寵恩詳慎縝密不驕不矜凡受任靡
不竭盡心力是以官無廢事民庶樂康盖卓然有大臣

之風是以樹碑墓道以垂不朽予既為次序之而復系以詩曰猗歟許公中土之英少克務學遭世太平發迹戎幕尋陟機要復陞鴻臚益臻榮耀貳卿之任佐理式勤益國利民譽日以振督運糧餉從征北土將士給足歡聲載路于彼南交版賦未清具陳可否深協聖情二皇嗣位益隆眷顧錫命推恩光照宗祖聖皇繼統篤任弗渝命撫河南民用昭蘇迨進司馬璽書獎諭機務孔繁實深倚注惟公砥礪理國如家經慮多方茂著才華

尚未耄期遽爾遐棄帝用嗟悼賜葬及祭恩命載臨哀
榮始終勒石墓道垂耀無窮

詹事府少詹事曾公墓碑

楊士奇

天之生才甚難也然高明強毅弘博奇偉智能勇畧之
士世未嘗乏用惟文章者不易得夫探造化之閔徵帝
王之法通古今之賾淳溜融會而後出之上焉者發揮
性道修正人紀此聖賢之事不可幾及次焉者惟明義
理紀述功德作為風雅以鳴國家之盛司馬遷相如楊

雄班固及韓柳歐蘇作者之事然亦代不數人焉信乎其難也國家自洪武以來有文之士其可以嗣遷固者蓋有之矣太宗皇帝御天下慨然欲作新人才興起斯文而龍飛第一科進士中簡明秀通敏者二十八人就文淵閣盡出中秘書俾進所業朝暮大官供膳月給內帑鈔為膏火費蓋期之於古人曾君子啓其首也君名榮時以第一人授翰林修撰授承務郎遂晝夜淬礪大與學俱進上時召試子啓迅筆千百言立就不費思索

而理致大采皆到雖苦心思索者有不能及上屢舉羣
書隱僻事以驗所學靡不悉對以是深見獎重遂名聞
天下明年修永樂大典為副總裁五年陞侍講授承直
郎七年扈從巡北京數侍燕閒應制賦詩並荷褒嘉後
有薦文士於上者必問得如曾榮否卒之考其能未有
庶幾跂及者陞承德郎預修太祖皇帝實錄十一年復
扈從巡北京十二年考北京鄉試十三年廷試充讀卷
官實錄成賜鈔襲衣文綺十六年考禮部會試陞侍讀

學士授奉訓大夫修天下郡志為副總裁二十二年考禮部會試仁宗皇帝嗣位陞左春坊大學士仍兼翰林侍讀學士日以經史進講文華殿從皇上之南京還預修太宗仁宗實錄宣德二年考禮部會試五年充廷試讀卷官兩朝實錄成賜金織襲衣銀幣陞詹事府少詹事仍兼侍讀學士賜寶帶子啓為文章如源泉渾厚沛然奔走一瀉千里又如園林得春羣芳奮發組繡爛然可翫可悅賦詠之體必律唐人興之所至筆不停揮狀

寫之工極其天趣他人不足已嘗有餘四方求者無問
貴賤日集庭下靡不酬應一時大人所作碑碣記序表
贊傳銘詩賦流布遠邇蓋未有如子啓之富者工書法
草書雄放有晉人風致自解大紳胡光大後獨步當世
儀貌魁偉襟度坦夷而精神洒落善譚論簡而有味良
辰清景擇勝而遊未嘗以事廢其天性孝友慈厚喜獎
拔士類交際有始終之義急人之急無論識與不識平
生以及物為心使之臨民必有所濟惜其仕三十年恒

以文學在待近所及者未廣也素有痰疾一日侍朝遽引退上遙見之勅免常朝宣德六年冬疾大作命太醫視療明年正月二十一日卒訃聞上為悼惜贈嘉議大夫禮部左侍郎遣侍郎章敞賜祭命有司營葬給舟還其喪朝臣自公侯尚書以下皆臨奠春秋六十有一嗚呼人才之難成也一代之大人如子啓何可多得而今已矣蓋悼惜之無間言云曾氏世家吉之永豐其高祖晞顏宋兵部侍郎為江西湖南安撫使元贈武城伯妣

蕭氏曾祖選申元應奉翰林文字同知制誥兼國子院
編修官與其兄翰林直學士德裕皆有盛名于時妣胡
氏祖如瑤集賢院司直妣周氏考叔本洪熙初以子啓
貴贈奉議大夫左春坊大學士兼翰林侍讀學士而贈
其妣張氏宜人其配鍾氏封宜人子男三秬積种公之
易簣也以身後事屬建安楊公及余楊公既為著墓銘
余為書其墓石而係以詩曰鄙出有夏少康裔曲烈啓
封國為氏去邑為曾適魯仕邾國聖學述傳義親承素

王道統系後十餘葉新莽際爰以闔宗徙南避宅時與
吉心洙泗章逢蟬聯如櫛比歐陽之鄉吉之委宋元連
綿起祿位天啓文運赫昭晷公奮而興屬隆世天經煌
煌表人瑞影纓垂組侍廷陞操觚含毫應帝制岷江茫
洋萬里勢春空澄明雲錦麗重瞳回矚天容霽紀功述
德封金匱操執權衡品文藝宏章大什耀海內朝陽和
鳴鳳翩翩儒林翹翹拔其萃矜惻焚溺懷惠濟惟仁故
存未弘施沒奚憾今此賈志

尚書文襄周公言行錄

楊廉

周忱字恂如江西吉水人進士歷仕永樂宣德間官至工部尚書卒年七十三謚文襄太宗簡進士曾榮等二十八人入文淵閣俾進學公自陳願進學其間太宗喜曰是真有志者命增為二十九人改翰林庶吉士旦暮大官供膳月給膏燭之費公感激自奮于學與修永樂大典歲壬辰授刑部主事公為人既精敏而又盡心簡牘者所推讞無不曲當

蕭鑑撰
墓志

公擢工部右侍郎巡撫南直隸初蘇州稅糧負欠七百九十餘萬石常松亦然公至詢父老皆云蘇松民俗大戶不出加耗以致小戶連累納欠公乃使大小戶一例加耗官降斛斗久失糧長往往私造大入小出公奏行南京工部鑄造鐵斛發屬縣依造木斛較勘烙印給與糧長收槩於是出入均平蘇州糧額二百九十餘萬石公同知府況鍾奏減八十餘萬石舊例不許團局收糧糧長自徵收公曰此負欠之由也遂令各縣於水次置

圍編固聚一處糧長一人總之名曰總收定與加耗總徵平米上固每固設糧頭固戶各一名管收置立撥運支簿支撥起運加耗者正糧一石收平米一石七斗候起運之時酌量支撥如京通等倉遠運正米一石支與三石臨清淮安南京等倉以次定支置立綱運丈簿聽其博淺等項費用填註回銷支撥羨餘存積在倉號曰餘米次年餘多令加六徵收又次年益多令加五除依前撥運外猶有附餘令各縣造倉一所名曰濟農將遞

年撥運剩米運入以備賑濟或農民缺食及運夫遭風被盜者賑給借納秋成抵斗還官修築圩岸開挑河道人夫關納口糧秋成不還其賑濟農民每歲揮蒔之際於中下二等戶內驗其種田多寡給之秋成隨糧還官若遇凶歲則再賑之不還者不復給往時裏河運糧軍民相半軍則官為打造淺船民則自行僱船裝運經年往復多失農月公乃與平江伯陳瑄議奏軍民令於淮安瓜州等處水次對船交兌令衛所出給通關付還銷

徵在淮安正糧一石兌與平米一石五斗瓜州兌與平
米一石五斗五升如各處并南京衛所運糧官軍未曾
過江者聽於蘇松常鎮等府縣兌兌加與過江船錢米
二斗豐年米賤兌與加七五升凶年米貴兌與加六五
升視墊蘆席折米五合方兌船在江或遭風公又令州
縣支糶餘米蓋倉二十餘廩於瓜州江畔遇到船糧搬
入收貯聽候兌兌畢日量支餘米僱人看守

古穰
雜錄

民間馬草每年運赴兩京上納若北京每包草一千束

該用五百料船一隻人夫十五名草束在船十壞六七
所費不貲公奏於通州草場設立官庫每束折收白銀
三分一千束止用白銀三十兩若南京則輕齎赴彼買
納人皆稱便

北京文武職官俸糧皆領票於南京戶部關支當米賤
時一兩可買粟米七八石公因會議奏准折支金花銀
兩納官每兩准米四石解運京庫交收折支京官俸糧
嘉定昆山等處折納官布每疋准正糧一石舊例驗收

務重三斤糧解領布到官率因紗麤不堪觀驗十退八九公知之奏稱布疋斤重紗麤其價反賤紗細布輕其價乃高乞不拘斤重務在長闊如式兩頭織造色紗以防盜剪之弊從之

各處走遞馬匹及鋪陳等件死損多被馬頭科逼民財買補歲無虛日公創法每田一畝收米一升九合隨糧帶納另覈收貯遇有死損驗馬上中下價直給米備用馬頭科斂之患遂息

正統初淮揚地方被災鹽課虧欠公奉詔巡視乃奏令蘇州等府將撥剩餘米每縣量撥一二萬石運赴揚州各鹽場收貯照數出給通關准行各縣下年預納秋糧其米在場聽令竈戶將私鹽於附近場上分納即照時價給還糧米食用于時米貴鹽賤官得鹽課積聚民得食米安生上下賴之

十四年邊事緊急工部移文造盔甲腰刀撒袋以數百萬計其盔俱要水磨明亮公取餘米依數成造且計水

磨明盛非遲歲月不可暫令撥錫以副急用處事因而敏多類此

公在南圻凡二十二年兩遭喪皆起復視事

蘇松一帶稅糧有五六年未完者朝廷遣官催促相繼終未能完遂舉忱為侍郎往任之忱為人謙恭言若不出口謀慮深長一切破崖岸為之虛心訪問兼採衆論不一二年累欠之累數皆完羨餘之積日見充溢小民賴以賑恤歲凶無慮歲輸京師之米甲於諸省朝廷每

勞其能亦善於附勢中官王振極重之宦其地者無虛日人人得其所欲釋子建造者必往求之所獲必過望

並古穰
雜錄

上任既專公亦盡心於其職為人謙恭不立崖岸言若
不出口謀慮深長善采衆論征輸皆有常度貢賦未嘗
稽欠且有贏餘遇屬郡有荒歉即以便宜從事撥餘米
以補不足之數凡官府織造供應軍需之類盡出於所
積餘米蓋民賦歲一石五斗之外漠然不見他役之及

而官府無復科率之擾諸縣學校先賢祠各郡橋梁河道多所修葺濬治一切取諸餘米人爭為立生祠沒因以祀之其後戶部言濟農餘米失於稽考奏遣曹屬盡括歸之官於是徵需雜然逋負自若人益思公焉

長史金實送公還東吳詩云公當永樂初讀書文淵閣閣下四庫書我實司管鑰緒閱窮古今寢寤攻製作氣若橫海鱣志欲吞恒岳駿如汗血駒千里思一躍時雨沐春葩鵜膏淬霜鏑拜官屬司冠利器遇盤錯無情不

得盡焉用施鼓朴中年樂散地娛嬉事棋槊巧匠高縮
手無地施善斲天生有用才豈俾久寂莫忽如鵬快風
萬里翔寥廓東吳財賦疆國用之所託料量出心計調
度歸掌握守令受成筭里胥奉條約富豪絕兼併農田
逐耕穫官儲足賑貸私負釋纏縛雖遭大侵歲不致填
溝壑小民相與言輒以手加額自從相公來濟利誠溥
博既無倒懸苦迺有邨田樂相公朝天去還期在冬朔
屈指筭歸程扶攜候江郭東南數十郡到處省民瘼潤


如甘雨零明似福星灼大夫得如此豈負平生學

覺非集

學博而邃禮和而恭茂著才猷爰作司空撫綏南服國
計以豐民無移粟歲不知凶惇大成裕沛乎有容沒而

尸祝人仰休風二十八宿孰能右公

彭韶撰贊



明名臣琬琰錄卷二十一

欽定四庫全書

史部

明名臣琬琰錄卷二十四

詳校官侍講_臣陳萬青

刑部郎中_臣許兆椿覆勘

總校官編修_臣王燕緒

校對官待詔_臣胡士震

騰錄監生_臣何彤

欽定四庫全書

明名臣琬琰錄卷二十二

明 徐紘 撰

刑部尚書魏公神道碑

王 直

正統九年閏七月二十七日刑部尚書魏公以疾終於家事聞上為之嗟悼遣官賜祭命有司治葬事在朝士大夫亦莫不惋惜致賻奠先是公有足疾詔俾釐務免朝參久之未能愈公嘆曰食君祿而不一造朝心豈能

自安八年二月拜疏乞致仕上憐而許之降勅慰且賜鈔三千貫歸一年而終年六十三公諱源字文淵幼而岐嶷喜讀書習於禮節十三能屬文嘗作桂花詩為時輩所嘆賞選為學官弟子永樂乙酉以書經領鄉薦明年取進士拜監察御史所至舉其職松江知府黃子威被誣不能白公為辨其枉浙東傍海民困於漁課為奏減之西安大疫民間比屋不能興督有司具醫藥往療全活者甚多涼州有寇將大為民患公廉得之亟請兵

殄除民得免害父母相繼卒皆奪喪起任職為御史九年陞浙江按察副使未幾召還署刑部右侍郎會河南旱饑民轉徙乃命公為河南左布政使至則發倉廩以賑民奏免逋賦省徭役及諸不急之務一以安民為事民稍稍來歸而雨亦大至是歲有年召為刑部左侍郎食從二品祿或言四川邊務多弛廢命公往理之明罰飭法衆務修舉還朝拜刑部尚書獄無滯囚凡公所決斷者人人自以為不寃時上注意邊事又命往西邊督

察諸將謹防邊以便宜從事遣都指揮李謙守獨石楊
洪副之劾奏指揮杜衡等慢令當死諸將始嚴憚不敢
肆自天城抵朔州視要險地宜守者凡八分命諸將守
之請增修開平龍門城使高大皆覓以甃庶可守又自
獨石抵宣府增致墩堠發開平龍門兵併力為之屯軍
免其租一年凡諸大城堡請給神銃火藥嚴為備上皆
從之再遣勅嘉勞焉時諸軍有勇壯者依托權豪以避
役公悉搜括歸伍中權豪側目一弗顧既而病足不能

朝遂以此致仕大夫君子皆惜其去而亦莫不以為榮
公忠厚坦豪孝於親友於兄弟睦於宗族而信於朋友
與人交必依於仁義其襟度夷曠洞見肺腑事有可疑
者得公處之衆無不愜意凡公所涖人至今興歎不能
忘魏氏先居南昌之奉新後乃徙建昌故今為建昌望
族曾祖父卿祖庭都父伯泰皆有德義而不仕及公貴
祖考皆贈資善大夫刑部尚書妣皆贈夫人公娶盧氏
四子鑑鐸欽銓側室石氏生一子曰銘孫男十二瑛瑞

璋瑾環珮珂珪珎琰玼公以某年某月某日塋于邑之甘泉鄉某之原鑑來京師謁予告曰先人不幸弃諸孤朝廷寵終之禮厚矣惟墓道石宜有文以示久遠非先生誰能為敢以請予最知公不可辭乃為序述其事而系以銘侃侃魏公有美在中乘時而升事我太宗始為御史職是憲紀爰副外臺來表俞美方伯之尊遺愛實全遂陞秋官民用不寃皇撫萬邦威制遠域公行邊師武臣竭力伊維邊城隆隆軍聲萬里塞垣纖塵不驚

公既勞只簡在天子以疾而休是謂知止邦家之光閭里之榮溘然上征為風為霆甘泉之山神道有石揭德振華以示亡極

兵部尚書柴公墓誌銘

王直

公諱車字叔輿姓柴氏世家錢塘靈芝鄉之義谿曾大父諱茂有隱德大父允明父望皆以公貴贈嘉議大夫兵部右侍郎母嚴氏贈淑人公自少聰敏喜學遊郡庠從徐大章先生受春秋學成領鄉薦遂入太學諸生多

推讓之永樂甲申擢為兵部武選主事即以勤慎得名
未幾陞員外郎己丑太宗皇帝北征公與方尚書從行
凡軍務倚辦於公公隨機應變無留事凡官屬從公者
又能庇佑之衆皆樂從及還陞江西叅議時營造事嚴
公入閩中取大材丁夫之貧病者公處之有方故能集
事而民不告勞初經廣信太守與公有舊餽蜜一罌疑
其重發視之皆白金笑曰此所謂故人知君君不知故
人卒拒不納至閩縣有婦人抱嬰兒哭訴曰夫亡田產

見奪於豪橫公察其實移文所司斷還之歲餘入為職
方郎中職方事最繁公治之有餘力會謠言當有變詔
沿江諸郡擇賢守以公知岳州公鎮以靜民安之岳州
有江湖之險官船來往當役民上下挽送多或至千百
人暮夜促召不能集公私病之公計主客戶有丁幾何
約三丁役一丁五十人領以總甲署其名小牌百人領
以百長署之大牌視役之多寡用之牌下皆來集無後
者民得番休皆便之公事之暇則至學宮與諸生講學

或行田間視耕穫賞勤而戒惰居三歲郡大治復召為
職方郎中丁內艱奪情俾任事宣德庚戌陞兵部右侍
郎公素有才望人僕其進命下皆為喜轉左侍郎時餘
敵假息塞下西鄙戒嚴朝廷命將往經畧之以公重臣
俾叅贊軍務凡發卒蒐騎積穰餉為戰守備皆有條法
上嘉之賜織金綺衣一襲先是敵入鎮番副總兵劉廣
自涼州出兵往援遇敵而退敵隨逼涼州廣閉門不敢
出乃大掠而去廣不以實聞反奏功徵賞公劾其罔上

又陳其欺誑不法事甚悉請必寘之法詔械送廣父子
至京師又劾秦寧夏等守將失律亦召還上益以公公
廉詳慎為國盡忠賜白金三十兩大綺三匹有副公前
後章數十上皆剴切人或以後患怵公公曰吾敢愛身
以誤國耶由是同事者或不悅其所為公亦惡其樂燕
樂忽大計遂斷酒肉澹泊以自處凡燕樂皆不與而持
論益堅必據理守正每有功賞雖勅下必覆驗而後行
詐冒必糾正無毫髮私岷州土官都指揮僉事后能以

家人冒功得陞賞公奏罷所陞官能復以為請上宥之
公反覆論不可曰詐冒如能者非一人臣方按覈皆請
罷今宥能如餘人何若無功而得官則捐軀死敵者何
以待之朝廷倘以能士人宜寬假則以他名賜之爵人
莫敢援例若冒詐而陞臣實以為不可詔嘉公忠誠遣
使賜白金四十兩綺帛各四疋特命食從二品祿秩滿
陞尚書仍理軍務既而事平西師亦解嚴庚申召還賜
以羊酒命視事且侍經筵聽講其年八月告歸省墳墓

上可之然尚欲託以邊事命公速來賜鈔五千貫遣焉
辛酉三月公還朝已感疾命太醫日往視予善藥冀速
愈而公疾益甚數驚悸起曰誤事誤事命速治行蓋心
不忘其身之病也上聞之而憫焉俾還鄉治疾未行疾
大作竟不起六月二十五日也享年六十七娶王氏封
淑人子男三拱扞拭孫男一訃聞上為之惻然遣禮部
尚書胡公濙往祭之命兵部給舟楫還其喪工部治喪
事扞乃以翰林侍讀學士苗先生所為狀謁予銘竊嘗

念之朝廷之於西事蓋慎重矣嘗宿勁兵任良將又輟
近臣往臨之欲以安內全外然其忠於上仁於下不為
利回不為勢屈者蓋無幾是以安全之効不立迨天子
赫然更命將帥而公等夙夜圖議振頽綱去弊事明賞
罰以示勸懲而人始知有法思奮其材武以從征伐立
功名於是餘敵影滅跡絕而天威振動於萬里之外矣
今邊鄙晏安烽火不作雖神謀睿筭使然而公等之功
亦豈細也哉宜聖天子悼念之篤而恩禮之周公之大

節如此若其交友敬臨財廉奉已有度待人有益不附
勢以干利其美盖不可勝書姑序次其大者而為銘使
後世有考焉其塋以某年某月某日其墓在闕之原

銘曰允穀柴公學以植躬遭時而升遂躋顯融三十餘
年出入中外克一其心以熙帝載帝曰西顧予欲汝為
殄此衆敵汝往視師維公謁謁羣志爰發乃暢皇威幽
遠畢達邊塵不驚公與其功何以致之繫公之忠天不
憖遺國有典禮寵榮式多哀念無已松栢丸丸有慰其

接踵同朝久且相知義不可辭君諱安然字晏如自少力問學尤工書其楷書學習小篆則師秦相早有名鄉邑太宗皇帝銳意文藝必欲追配古人君優游館閣益自勵務欲稱上意仁宗皇帝在東宮雅知之常令繕書以進今藏于祕府永樂十五年擢拜吏科給事中以恭慎舉其職日侍上左右有所顧問敷奏詳明同輩皆推服焉仁宗皇帝即位陞吏科都給事中益憂懋不懈人未嘗見其有過舉今天子即位三年大正庶官以修百

度以君為右僉都御史蓋是時持憲者多以賄聞由是用君其間君感上知遇確然自守不為衆所惑思欲稍拯其弊事不可即懇懇為其長言之多見聽從然猶膠箱牢密君未及有所振舉而以內艱去蓋在任不二年君去而其長及凡附託者皆得罪矣服闋仍為右僉都御史兵部以武職貼黃久不清請會官清理如故事上以命君君與翰林侍讀苗君衷皆從事於此同力一心罔有漏失有顏鎮撫既卒子孫當一人繼乃復以一人

冒官三十餘年無覺者君閱其實乃奏罷一人又著令
凡武官有靖難功而無子者不忍遽絕其祿得以婿或
義兒一人繼不再及也有張指揮者既以義兒者繼矣
又欲冒及其子因有所調發託統帥以疾豫以子代亦
十餘年矣君亦奏請罷之其臨事用心不苟皆以類而
不能久於世豈非可惜哉曾祖關祖德皆不仕父彥能官
至應天府通判坐累罷居均州仁宗亦知其為人因君
為都給事中即令冠帶造朝以都給事中致仕歸湖州

今加封右僉都御史君幼娶周氏卒有一子曰敬再娶
唐氏四子曰啓肇敦敦於乎自古聰明才俊之士遭時
奮身皆有志於功名以顯當時傳後世然而不至於大
有建立而卒如君何恨蓋莫非命也使君得永年其所
立豈小哉今雖不幸而其居官行事之善不可以泯也
故表諸其墓

副都御史賈君墓碑

楊 榮

天眷我皇明挺生俊乂列于庶位以理政務至于內佐

風紀振憲綱而外播恩威除姦宄植善良者若正議大夫資治尹行在都察院右副都御史賈君亦其人焉君諱諒字子信其先克之武城人洪武初徙家嶧山之陽祖志剛父旺俱不仕以君貴悉贈嘉議大夫都察院都御史祖母顧氏母魏氏俱贈淑人尹自幼卓犖穎拔異羣兒由邑庠生應永樂辛卯鄉舉升太學太宗皇帝時選侍皇太孫說書講論詳明深沐眷待歲甲午擢刑科給事中宣宗即位陞今職委任既重君愈敬慎凡所施

為務悖大體不事末節夙夜匪懈稱厥職遂得推恩贈
祖父母父母以及其室焉初君在刑科也克體朝廷欽
恤之意獄有冤抑即以為言或至再三必得請乃已人
或言其執奏太過君曰近侍以言為職苟知而不言其
如人之冤抑何江淮間賊徒操舟劫殺番使君受命往
捕既至以計悉擒之按行鈔法于京都人不之駭鈔以
流通密察百職發姦擿伏人不敢犯其居內臺也詳讞
重囚務求其生必底無可生之理而後已江右豪民肆

毒君往按之得實悉寘于法良善獲安川屬姦盜作梗
惟捕其首惡餘黨解散及奉命督山東等處陶冶秦咸
工程蠲免虛數民力以紓今皇帝即位首令往鎮湖湘
撫緝有力陟黜惟允巡視淮濟賑活饑民千餘萬督築
固安隄河道疏通人不知勞邇因徐州強賊反獄潛處
芒碭間時為民患復奉命捕治還至荏平遭疾正統己
未正月十有四日卒于德州訃聞聖上嗟惋遣官諭祭
命有司為治葬事君生洪武壬戌六月十日得年五十

有八配石氏側室郝氏蔣氏子男三俊傑偉女四俊以
卜卒之歲某月某日奉君柩塋于城東馬貴社先塋之
次先期奉翰林編修許道中所述行狀泣丐予銘其墓
予於君有同朝之雅歷官行已亦所聞知狀復稱君篤
於事親始終盡禮兄子儀早孤撫育無異己子茲又仁
德推于家者也若君者不可以不銘銘曰惟天生賢以
時登庸輸忠服勤代理天工猗歟賈君遭逢盛世擢官
黃門克稱于位天憲有佐特然超遷粵自筮仕迄今有

年惟忠惟勤終焉如始為國為民匪私于己夙猷茂著
列聖受知中朝外服績用咸熙命雖不永所存者久勒
銘有碑庶傳不朽

章尚文傳

楊溥

尚文名敞世居會稽高祖斌宋景定中鄉舉第一祖君
乘父可道世有善聞尚文穎敏有智畧初補郡庠弟子
員日以讀書攻文辭為事服食之需不計其有無永樂
癸未以詩經魁鄉試明年第進士入翰林為庶吉士同

狀元曾榮而下二十八人績學文淵閣預修永樂大典授刑部江西司主事尚文究心理斷訖無冤滯久之復入翰林纂修輯五經四書性理大全書成受重賚時山西有盜掠人財詔有司亟捕之逮至數百人尚文適當其事上官督之甚急尚文曰殺人重事豈宜率易編鞠之皆有辭一人辭色獨異尚文収其辭色異者餘悉疏之俾明日復來明日亦如之衆皆如約勘其為盜者果一人衆始為尚文危終乃深服之有何千戶者商數輩

莫宿其家被刼商疑何何訴之官恐不能自明乃縊死
事聞詔巡捕者三日弗獲抵死既三日不獲則拘隣何
者二十餘家別楮幣證其為盜尚文諮之曰商遠來而
楮幣約皆斷何也捕盜者不能隱遂首伏二十餘家皆
得釋未幾陞本部員外郎授奉訓大夫復陞本部郎中
丁外艱歸起復行在吏部考功郎中洪熙改元賜誥命
授奉議大夫推恩父母丁母夫人憂服除調驗封郎中
尋陞行在禮部右侍郎進階嘉議大夫加封父母及祖

父母如制奉詔往安南命酋首黎利權署國事尚文宣
威德讐服利郊迎拜使者常下利令所親給事左右數
進甘言誘以聲色尚文正色遏絕之及還賂以金珠異
物多方致之尚文堅却不受及利死朝廷以其子麟署
國事復命尚文往諭之關吏曰此天使前却金者再來
矣比還麟所贐皆却之不受更進平陽王復封晉為恭
王皆所以有田土及護衛官軍房舍有司莫能處分王
以為言詔遣尚文往理之至則勘其田土悉歸王府房

舍驗所有軍士給之餘悉以居民王樂從之復遷左侍郎與尚書胡公協謀國家典禮前後損益不同吏無所據或緣奸乃取國初以來所行條格籍記之於是司屬遂有所持循太醫院醫士妄舉鄉人為醫以復私怨時為積弊奏革之僧道請度牒者歲以千計奸偽日滋請遵洪武中例循舊額三歲一給其有舉任僧道官者不許越州郡由是奸偽者漸息會同館四夷朝貢者日給廩餼往為監臨侵剋乃嚴為關防以副懷柔之意尚文

為人尚誼氣調卹朋友曲盡其道不以患難死生為輕
重平居簡靜遇朋友談笑戲謔襟度豁如然絕口不道
政事及臨事井然有條為文簡潔所著有質菴稿藏于
家壽六十二其子瑾正統丙辰進士克世其家云論曰
士君子抱負才氣修志山林無聞于世者何限哉尚文
際明時為顯官處順安常克諧所事蔚然有聲稱書曰
時人斯其惟皇之極有以哉

右春坊右諭德黎君墓碑銘

楊士奇

右春坊右諭德黎君以正統二年十一月謁告歸清江
得疾卒于家其孤統以翰林侍讀習嘉言所狀事行求
書墓碑余聞而哀之曰嗚呼黎君之擢第也為良進士
入風憲為良御史於長民為良郡守於近侍為良輔臣
奈何遽止于斯乎黎之先見余所作其考墓表其曾大
考允誠大考惟琇考宗瑞妣鄒氏以君貴考贈右春坊
右諭德妣贈宜人君兄弟三人其季即君諱恬字潛輝
天資清淑生六七歲知慕學問累從明師得其旨歸而

自進其功永樂壬辰擢馬鐸榜第二甲進士無幾丁內
艱去服闋除陝西道監察御史以正直揚風裁歲辛丑
朝廷以災異求言羣御史同上奏實君具草歷詆大臣
之任事者無憂國恤民之心剴切激厲無顧避上曰御
史言是任事者不能堪後薦御史之才可用於上皆陞
知州而處之遠方君得交趾南靈州尤僻遠君怡然曰
聖人不鄙九夷我何人哉既至教愛其民如子民皆父
母師事之政化既行會叅利反其衆日盛總帥王通孱

弱不能制為吏所協遂矯制勒三司郡縣官吏悉解職
守隨通北歸君時在行既歸通及協謀者皆坐法朝廷
以事不出於衆悉置不問宣德七年士奇率同官言黎
恬文學操行可任近侍遂命為右春坊右諭德授奉直
大夫時春坊事簡奉旨入翰林院與纂述考最賜誥追
贈其考妣預修宣廟實錄簡充經筵官奉命考禮部會
試者二用心公正時多得人遂謁告歸展先墓賜道里
費給驛舟既展墓樹碑墓側退而治其親戚鄉里懽甚

將行得疾醫藥久弗效以正統三年正月廿二日卒享年五十有一君篤孝友之行而磊落有大志恥屑屑流俗事學博而正論議沛然為文章波瀾藻麗而根於理存心公平於論人之邪正事之枉直靡不服之盡心公務未嘗苟且非其人弗與處容色潔白如玉儀度恭肅人不可犯而雅度洒落良朋勝友卒然邂逅詩酒倡和酬酢率極懽而罷其藏修之齋名熙熙所著有詩文集若干卷其娶先教氏贈宜人繼王氏封宜人子男四統

縉頌生顥生孫男二昇生冕生其塋以卒之歲某月日
塋某原與教宜人合塋焉黎君余考禮部會試時所取
士又以同鄉故相知深而相與久其仲兄慎兄子經皆
有文學於余往還余嘗謂清江自劉氏公是公非而後
有一家三人聯璧輝映者今再見於黎氏居無何慎卒
經又卒黎君每向余道其兄與姪未嘗不泣下余亦為
之感歎豈意又於今哀悼黎君哉銘曰清江之黎代襲
詩禮由金三州徙坂城里自其高曾潛德弗揚迨其大

考武弁奮庸卓卓潛輝篤志問學升自賢書秋空鵬鶚
鐵冠白筆北面在廷用振憲紀用張國經觸邪指佞動
植有知昔之所學今惟行之既斥遐僻俾治夷類不賤
鄙之躬勤撫字夷亦有心曰我仁侯父之母之而肯以
尤既陞桂芳所職輔導詞苑經維在帝左右方將顯庸
曷殞遽亡栢松中仆不至柱梁嗚呼潛輝其藏我銘後
有考徵庶其猶生

春坊諭德林君墓誌銘

楊榮

宣德二年五月辛亥奉訓大夫右春坊右諭德兼翰林侍讀林君卒于官交游之士莫不為之傷慟臨終之夕其孤雲瀚適自南京至幸履一見不及有所言而絕良可哀也將奉柩歸塋于鄉某山之原乃匍匐涕泣以翰林修撰王君鈺所述行狀來乞銘予與君同鄉又同官而素相好弗可以辭按狀君諱志字尚默晉黃門侍郎穎之後穎從晉元帝渡江居建康其子祿由散騎常侍出為閩之晉安太守子孫因家焉是後有仕為宋御醫

院使諱古松者君之五世祖也曾祖諱清祖諱顥父諱興音隱德弗耀母游氏宋監察御史廣平公之後嘗夜夢梁僧寶誌入室而生君因以名焉幼穎悟其母嘗口授經傳即朗然成誦在髫髻時已喜為文辭後從學于王偁孟陽極好辨論因字之曰尚默將弱冠選入郡庠益自勤勵於經史子集旁及天大地理星命醫卜之書無不研審而尤工舉業性至孝父早世事母益謹或有疾則憂形於色親調湯藥不敢暫離左右及母歿家雖

貧薄而殯殮葬祭一於禮而不苟永樂辛卯鄉試壬辰
會試皆第一殿試賜進士第二人授翰林編修考滿陞
修撰嘗纂修五經四書性理大全古今名臣奏議郡邑
志書辨論精確勤於編述迥出儔輩甲辰秋九月陞侍
讀尋陞右春坊右諭德仍兼舊職陞奉訓大夫給二俸
嘗兩為京闈考試官去取惟公士子敬服洪熙改元蒙
恩賜誥得推恩追贈其父如君之職母為宜人每痛二
親不逮祿養語及必悽愴終日蓋君治家儉而有禮待

宗黨極厚族弟喜孤幼無依養於異姓取歸撫育迄于
成立勸子姪讀書言不輟口間有領薦者輒加慰勉與
鄉人周旋款洽不事矯飾鄉人亦多敬愛之事其師孟
陽最謹孟陽後為翰林檢討以事沒于京為之經畫喪
事以歸其妻子于閩處僚友必誠必信于人無所毀譽
在朝十有五年入則恭勤趨事惕然警勵雖隆冬盛暑
不自知其為勞退則靜坐一室優游疎散醉吟自適淡
然若與世事不相干者家居時郡庠後進多從之游若

今湖廣叅政黃澤浙江按察使林顧輩皆親及門受業
時多推其學問有源委以為吾閩之傑然者自號葑齋
又號見一居士所著詩文確健簡古多為人所傳誦與
修二聖實錄方擬告成歸省丘墓展焚黃之禮而乃以
是春疾作自知必不起遂請于朝得告而即日加劇第
奄奄一息以待其子之至而卒其生洪武戊午八月四
日至是享年五十配陳氏有淑德封宜人子男二人長
曰雲瀚次雲壑女三人嗚呼幼學壯行君子之志也惟

君荷聖朝教育之恩學既有成官兼顯秩可謂榮且盛矣亦可謂得行其所志矣烏可以無銘其辭曰林氏之先閩閩以崇粵自建康始居閩中歷世相傳其積彌厚發之於君獨稟其秀孝友篤志信誼卓然學有源委思如湧泉爰擢巍科超出流輩拜官翰林詞益濤濤編摩纂述克慎克勤侍讀講筵忠賢是陳輔導春宮多所裨益考藝京闈公論籍籍不盈以矜志節允堅無毀無譽罔不推賢善積厥躬惟君之德學淑諸人惟君之澤閩

山蒼蒼閩水汪汪藏石于斯百世不忘

明名臣琬琰錄卷二十二

欽定四庫全書

明名臣琬琰錄卷二十三

明 徐紘 撰

吏部尚書黃公神道碑

王直

宣德十年今天子嗣大寶位臨萬邦顧南京根本重地
建置百司而置吏部為之首宜得謹厚大臣往蒞之九
月以命吏部左侍郎黃公宗載陞辭之日詔進為尚書
以行士大夫知公者莫不譽歎以為宜在京南八年以

老疾求致仕上初不許章四上乃許之歸豐城故第又
幾年年七十以九疾終訃聞命禮部致祭工部為治墳
塋明年十二月二十一日葬于其鄉梨樹岡之原葬已
其子儒剴來謝恩闕下詣予拜且泣曰先考之葬朝廷
寵終之禮厚矣于今得樹碑神道而未有文敢以請予
少於公而辱交久誼不可辭黃氏於豐城為大家公曾
祖仲軒有隱德祖以仁考子貞以公貴俱贈吏部侍郎
進尚書妣皆贈淑人進夫人妻余氏亦累封至夫人公

自幼喜學年十五已能為里塾師為郡庠弟子從熊伯
機受春秋遂取進士為行人謹於自治奉使四方未嘗
受饋遺歷左右司副為司正以父憂去治喪無違禮不
飲酒食肉者三年服除領舊職永樂癸未以賢舉授湖
廣按察檢事時湖廣諸道惟銅鼓五開最難治分巡刷
卷者多憚行蓋天下巨姦宿猾皆謫戍其間善舞文弄
法興事撓官府而陰把持其短長往者欲稍按治即糾
結如沫漆不可解欲一切漫漶則見嗤無可奈何多避

不肯往公至當刷卷即毅然治行到武夷問風俗知其
人苦於從軍女子惡為軍婦不果嫁男子則慮婦家往
從戍而以徭賦累已不果娶至年三四十猶獨處公召
鄉老里正諭人道大端俾轉相告語務嫁娶以時不踰
月成婚姻者三百餘家他縣間風皆樂從俗為之變乃
榜諭銅鼓五開諸姦豪數其罪惡且發其善端曰不改
必寘之法衆知公務以德化人相戒勿犯比至莫有干
分背理者丙戌徵詣文淵閣修永樂大典書成受賞而

歸戍子朝廷以海運糧餉赴北京下湖廣造海船四十
九命擇風憲官之賢且能者蒞其事衆議以屬公而工
部所遣官務苛察生事將聞于上以銜能公鎮之以靜消
其毒螫而落其機牙得不擾而成功己丑車駕將北征
遣都指揮吳正徵兵湖廣王暴貪失期上謂按察司官
不糾劾于是公與同僚皆坐累謫楊青驛公遽之如平
時遺一力受役而躬自執爨未嘗有不豫暇則閱書史
以吟咏自娛癸巳復起為山東道監察御史侃侃自持

不肯少貶以徇俗乙未上親策士于廷時鴻臚無卿丞
張斌任事恃城守功最狠戾多所中傷人頗憚之以不
與讀卷至爭論上前不已公奏斌不學無識不可以讀
卷乃敢煩瀆聖聽如此當伏法士論壯之丙申命巡按
交趾交趾城中諸軍營房覆以茅故多火公兼知軍民
歲歲伐材陶瓦備官用然皆資權豪命三司幙官稽其
數凡有取者皆著于籍由是無敢私費不半年營房皆
易以瓦覆火患遂息時工部尚書東萊黃公福掌交趾

藩憲二司才行過人而不事邊幅御史往者多庸常視之至公獨恂恂恭讓而法亦不廢及歸行李蕭然無交趾一物東萊嘗語人曰吾久居此所接御史多矣唯宗載知大體己亥丁祖母憂居家有旨奪情授貴州道監察御史益謹禮蹈義遇事必究極是非不曲隨苟止於禍福利害不計也故再陷刑辟而賴公道以免甲辰宣宗皇帝正位東宮以東宮僚職輔導擢詹事府丞未幾陞行在吏部右侍郎時少師蹇公猶兼領吏部事多倚

公公協力一心進退人才必以公論不苟為異同故一時號得人洪熙元年賜誥命制詞有清潔平恕恭謹厚重之褒是年遣祀夏禹及南鎮會稽山因賜鈔八百錠俾歸焚黃于墓下其後嘗奉命往浙江理軍政及伐宮殿大材於湖湘設施措置舉不失宜故事集而民不告勞久之遂有南京之命蓋上知其老而欲安之也南京雖無銓選之勞而勞於馭吏蓋其人多邪巧才見害必避見利必趨往往冒法以僥倖公正已率物無少回撓

屹然如太山喬岳不可撼陰陽闔闢風雷雲雨以榮悴
百物而細大不遺其施博矣已未進階資善大夫詞曰
寬和有執廉靜自持又曰小心慎職始終不諭人以為
實錄當是時公卿大夫齒德之盛莫如公及致仕而歸
猶康強無恙士大夫出餞都門外瞻望咨嗟漢之疏傳
不過也公既孝于親尤篤於二兄仲氏宗曼有孫孤承
裔貧苦不能自立公命其子文凱儒凱收養之文凱先
卒獨儒凱繼其家及公歸即為承裔治居室使仍守舊

業母廢墜其施於鄉族細行之美尤多茲不載姑序次
其大者俾刻諸神道而系以銘銘曰在太祖世經術取
士公乃奮興以克有位於皇太宗復舉用公揚于外臺
以肅庶工出入中外有勞有烈人望謂何邦家之傑遂
丞詹事遂佐冢卿式展其猷以宏厥聲天官之尊天子
所命殿于南京亦罔不正祇事列聖殆五十年殊錫寵
褒帝制在焉達尊者三公則兼備哀榮始終莫與為比
梨樹之原我新阡刻此銘詞百世之傳

都察院右都御史熊公墓誌銘
錢 幹

宣德九年十月甲寅都察院右都御史熊公以疾卒于
北京居第之正寢上聞之嗟悼賜祭命有司給官舟歸
其喪治墳葬于吉水縣之某里七歲孤端奉左春坊左
庶子兼翰林侍讀周公所為狀來請銘以誌于幽堂之
石乃為序曰公諱概字元節熊氏世為南昌豐城人祖
達夫仕元福州錄事卒於官考敬方幼無依母夫人攜
以適吉水胡氏因冒其姓今為吉水人公貴始復舊

姓馬用恩贈祖考皆資善大夫都察院右都御史祖妣
楊氏夫人妣郭氏封夫人公幼英悟過人甫成童聞父
講左氏春秋即知大旨忻然請授之由是書過目輒記
憶不忘父心異之比長學大進有志尚一時同輩不惟
推讓其學至其器識多自以為不及永樂六年戊子舉
進士于鄉九年辛卯登進士高第拜監察御史聽決精
敏若先於吏事者即以能稱父繇邑校弟子員陞國子
監生六館多所宗仰方是時太宗文皇帝駕幸北京仁

宗昭皇帝以太子監國事公侍朝立文華門下于大眾
中見其狀貌壯偉問侍臣誰何知者以公姓名對且言
父學行之美稱嘆久之以是父子益有聲於都邑間歲
餘父歿還家執喪哀毀如禮即起復為御史署刑部事
會藩憲大臣員闕太宗命吏部簡兩京朝臣之有才望
者補之公在選列仁宗宴之禮部予道里費至擢廣西
按察使慨然以戢吏姦恤民隱為已任屬谿峒蠻獠大
出殺掠民聲搖諸郡桂人大恐布政使議欲請於蕃王

出兵以遏之公曰吾等受方面之寄寇至無計捍禦乃以煩王事聞誰任其咎寇必不至戒嚴而已既而果然議者服其識其居官而沒于其土者家之道遠弗能還朝廷詔所在給舟車歸之有司迫切甚至公念男女生娶有一旦遣行貲用凋落奏乞聽其便從之尋調廣東仁宗正位召所擢用迨至而宮車宴駕矣今上親政銳然思用賢材以責庶事之實以新天下之治而常鎮蘇松淞東西諸郡豪右之民往往訴力持吏短長脅制州

縣肆毒良善無厭細民苦之上以公為可使改大理寺
卿命偕中貴人往按之公亦知上用己之意徧厯其地
凡官吏之無狀民之尤無良為人巨蠹者籍其家盡執
以歸于京寘諸法聲威振動於一時海鹽民史慶真自
號平康聚無賴之徒恣行剽掠有司累歲莫能禁聞公
至而盡室遠遁得之武昌抵以殊死于是姦宄帖息單
弱之民舉復其業父老動色稱快三尺童稚皆知公名
而相與傳頌之所至於餘力新學宮勸勵諸生先賢若

胡安定公范文正公魏子翁二陸祠宇之傾圯者葺之
范氏義田魏氏墳地之侵奪者歸之其子孫之有賢行
者祀之士類增重奸民有不便公者誣以受賊在勢者
以私怨欲擠之騰口昌言於朝上疑未之信遣御史廉
問豪髮近似無所得還乃直公所為用是上益知公之
賢為足任賜璽書獎勵公亦自信不疑於利害之當興
除者皆列以聞松江嘉興兩郡接壤處其間地大民衆
征調復役公私病之奏折其地為五縣如其請入朝問

勞有加特陞都察院右都御史往治南京院事始公之
出也鬚髮如點漆比還皓然盡白人皆嘆其賢勞及斯
命下又謂宜居是職公材長於從政務持大體疑獄滯
訟能立得其情而志存平恕每具獄推見至隱惟恐吏
售其姦民有不得其平故凡被其埋者人以無冤尤能
嚴束郡屬恒舉古人剛方有志節者警之詞氣俱厲人
人畏其威而莫不奉法以遵職憲紀用振明年賜誥命
進階為資善大夫榮其所出以及其配未幾太夫人以

壽終于私第官給祭葬命公扶柩歸葬起視事去年北
京右都御史顧公以病久在告召公馳至領其事至益
感激自効視居南京時勤又倍之在上前知無不言於
條囚之枉抑者多所伸雪故事車駕巡幸以文武重臣
留守公兩被是命今年兼署刑部事自朝慮囚日宴未
暇食忽風眩久之乃甦歸治于家踰數日駕遠猶力疾
入見退而愈劇勞以上尊強起拜受曰小臣被國厚恩
曷以補報是夕奄然而逝無一語及家事生於洪武十

有八年己丑正月初十日得年五十元配劉氏有賢行
先卒贈夫人繼配璩氏封夫人子男五人長煜壬子貢
士次焯次安次即端次盛孫男三人公為人身長六尺
神色明秀望之屹然可畏即之溫然可愛久而知其坦
然無城府人多樂與之交公與人交恩意備至居家孝
於親友於兄弟庭內無間言在官不以仕優而廢學有
間輒手不釋經史論說古今聽者忘倦為詩文豪偉健
麗似其為人尤善草書四方有求之者祁寒盛暑忻然

樂應之人得所欲而去所著有芝山公餘二藁藏於家
於乎公以一介之士遭值聖明起為世用出入二十餘
年位致通顯任國重事直已自遂始終保全是上之圖
任也專公之報稱者不顧其身無所不用其心假以多
壽所樹立當有絕者奄至於斯可哀也已習禮於公為
邑人復有同年之雅少相好也義不可辭故論次公之
世出里居行已為政之詳序而銘之銘曰於皇三聖如
天之仁文條武鬯若時之春公與時遇光奮于身踐更

中外為世材臣天子嗣位以聖繼神延登俊乂子育庶民蠹爾羣醜毒痛于人命公往治勞于咨詢扶植善柔誅鉏頑嚚大憝既去隱誅獲信天章有偉用旌厥勤歸典邦憲堂堂垂紳聳慄在列風紀由振奄其不留同朝頻呻曷以昭德銘茲具岷垂示後世永永不湮

都察院右僉都御史魯君墓誌銘 楊 榮

正統二年六月十日都察院右僉都御史魯穆希文以疾卒于官上聞遣禮部左侍郎章敞諭祭仍給舟歸其

喪既至家爰具葬事遂卜於北山之原其邑人翰林修撰杜寧為述其歷官行已之實來請銘希文嘗僉福建按察司使事操行履歷予知之悉故不辭為銘而叙之希文宋散騎常侍澤之裔建炎初澤自汴徙居于嚴七世祖初温州平陽令始自嚴徙居天台為天台人曾祖古訓祖谷瑤皆隱德弗仕考友敬以希文貴贈文林郎監察御史妣奚氏贈孺人希文自幼舉動異常兒里有識者語其祖父曰是兒他日當為偉器宜善教之稍長

肄業邑庠攻苦食澹篤志經史雖祁寒盛暑不少休息
常自書人常咬得菜根則百事可做之語于座右蓋已
毅然以清操自勵永樂丙戌登進士第勅賜歸榮于鄉
因是益肆力問學鄉生執經受業者亦多造就及赴召
有司贐鈔萬緡謝而卻之或曰行者以贐何用固卻希
文曰筮仕之始未有益于鄉里而先厲之可手言者愧
服嘗覈江北諸衛儲糧巡兩淮鹽法及監龍江抽分竹
木局綜理周密吏莫肆其奸既而以外艱去家居杜門

哀毀逾禮服除拜福建道監察御史介然自持人莫敢干以私時太宗皇帝巡幸北京仁宗皇帝監國希文屢上封事知者皆稱其為敢言又嘗鞫常州巨商法當死商家托其姻舊夜餽白金覲脫免希文斥而拒之竟寘之法秩滿擢福建按察司僉事理冤滯繩貪墨凡豪右一無所顧避泉州進士李某調官廣西妻吳少而美故富民林肆欲圖之陽與某善遣二黠僕偕行至中道毒死某并其姪吳還肆納之某之族人訴于郡及臬司官

受肆賂反罪訴者希文至廉得某執而訊之果服罪漳
州民許某富而無子初以姪為後晚而妾生子因析貲
產與而以子託之許死姪謬言子非叔出還之奄有其
貲希文按行至郡妾攜孤訴其狀希文乃于市集諸小
兒密以許之孤雜其中令父老別之父老獨指是兒狀
類許某必其子也于是悉歸其貲留江縣竟有四閘水
以蓄洩溉田數百頃為豪右專以自利歲旱細民羣訴
希文罪其專利者民皆驩呼鼓舞今上皇帝嗣位大臣

薦希文治行驛召至陞今職尋命相蝗大明廣平循行
千百勞來不倦民不之擾而害隨息暨還贊肅憲紀駸
駸有聲朝退方治事疾遽作而卒家無以為歛公卿賻
治其喪始克襄事希文生洪武辛酉

闕

日享年

五十有七配張氏先希文三月卒于家子男二曰昇曰
昂孫男三曰誠曰誼曰諲希文為人剛正清慎內恕外
嚴寡嗜慾薄滋味厯仕中外二十餘年家無饒貲被服
如寒士卒之日聞者莫不咨嗟歎悼嗚呼士之為世用

材足以應變知足以決疑者非不有也而求其清介有
守執法不回似希文者殆亦不多見焉是故不可以無
銘也銘曰介如石兮繼守之真直如矢兮維心之平維
介維直士德之偉人一羣稱君乃廣美方其蜚聲震耀
當時今焉云亡孰不悼思遙遙閩藩政傳永久奕奕憲
臺名著不朽天台之原考卜維新安此宅兆永裕後人
子昂一名崇志累官應天府尹循良愷悌人咸稱為長
者

吏部右侍郎鄭君墓誌銘

楊榮

士君子遭時得位才行兼茂克舉厥職上無負國家下
不負所志人皆仰其存而哀其歿者斯豈多見哉若故
通議大夫行在吏部右侍郎鄭君蓋其人也君諱誠字
文實世家建昌之南城高祖禎仕元為撫州路醫學學
錄曾祖德銘歷彭澤南陵二縣典史祖瀚遠以君貴贈
吏部右侍郎父守中累封吏部右侍郎妣王氏累封贈
淑人君生洪武庚午九月十日自少刻志問學選為邑

庠生究春秋之旨同輩自以為莫及永樂辛卯領鄉薦
入為太學生夙夜淬礪器宇日充歷冬官以勤慎自効
擢為吏部司務以職克稱尋以侍郎師遷薦陞考功員
外郎君雖年少居要職懋履謙恭事先輩以禮課功責
實無所徇人以是多之未幾丁內艱痛念母疾弗克躬
侍湯藥哀毀逾禮及葬陰雨不止君號泣籲天天稍霽
人以為孝感所致制未終特起改文選員外郎尋轉郎
中時同官孫英號稱狷介少許可以君獨加敬讓洪熙

紀元受誥命榮及二親宣德丁未歸省還朝仍故職庚戌以少師蹇公薦為吏部右侍郎選任精審數奏詳明尤為衆所推宣廟嘗召問庶官品級及居職者賢否君歷對稱旨遂受寶帶襲衣之賜今上皇帝嗣位益致公勤雖故舊執贄相見亦却而不納鄉人有為太學生者於公有宿怨及嘗受官自謂必見抑君惜其才權寘五品其所守所行類如此正統壬戌年十一月闕卒

于官自卿士以及僕隸莫不嗟惋翌日上聞為之悼惜

遣禮部尚書胡公致祭仍命有司治葬事君娶黃氏有淑行初封宜人進淑人子男一曰垕弟關來自南城將奉柩歸葬于鄉某山之原乃以刑部侍郎何君文簡所述事行謁拜請銘惟君天性孝友父嘗邁足疾繼以目眚君憂形于色遍求良醫得善藥輒附傳以歸療之疾遂愈奉繼母傅氏淑人不異所生遇諸昆弟及從昆弟俱有恩位臻貴顯歸拜舊師惟執師弟子禮見其貧厚遺以金繒待僮隸亦未嘗加以疾聲厲色居官二十年

小心慎密始終如一至其寬宇和易虛己容人識達政
要旁行不流卓卓乎有足稱者是不可不銘銘曰麻姑
之山秀擁一方下有盱水其流洋洋維水之清維山之
英孰其鍾之天官亞卿亞卿之生人中裊然師奇其敏
友推其先肇自小官薦登顯庸弗倨弗隨克勤克公勤
不自盈公而生明鑑別研媿衡審重輕天子曰嘉是為
能臣輿論攸歸咸曰偉人生不失榮歿不失哀悠悠逝
川去不可回勒此銘辭闕之幽宮惟千百祀令名罔終

國子司業吳先生墓誌銘

楊士奇

大學為國家成賢育材為興治之本所係非細故其師
範尤在得人而非道明德立心古人之心知本末之務
多士所心敬誠服者不足以稱任數十年來稱斯任者
臨川吳先生其卓乎表表者與先生以明正之學惇實
之文端厚之行峻潔之操挺然而不拙鵠然而不滓其
施教必先正本而後循序以達也蓋先生自讀書鄉校
已立志不遷家雖窶夙夜勤苦淬勵不奪於外物洪武

中選鄉貢病不果上後入充太學生祭酒司業禮之不
與諸生等奉命宣諭武臣雲南又閱軍士福建時奉旨
出使者所至皆有金幣之贈重朝命也先生一豪無所
受及歸其裝不益絲豪維經過山川所作吊古賞勝之
詩數十篇耳會試禮部擢第一廷試第四賜進士出身
授翰林院編修陞修撰考禮部會試纂修高皇帝實錄
書奏賜白金文綺及金織衣修永樂大典為副總裁吏
部言國子監關司業太宗皇帝曰此非可輕受其令祭

酒胡儼慎舉有學行可為師表者以聞胡公舉先生即日授國子司業居無何祭酒有他命自是皆先生總監事時士習日下舉者急於進取率不究心經傳惟誦習前輩程文以覬僥倖先生革之終日危坐堂上名與講析義理且說疑詰之使退求諸心庶有自得之益於為文必先義理而後辭采學者始趨實功不事苟得以禮法率其屬屬官中有不檢者數輩不便之相與求先生之短以沮之卒無所得又飾詐以謗之然先生素行孚

於外者久謗率不行有以告者先生但自引咎而已以是名益高而謗者益不容於清議雖弘度待物然未嘗屈已求合雖是權貴卒不樂之而自信益薦仁宗皇帝知之有素一日顧士奇曰朕即位以來兩京之臣多以序進惟南京吳司業未進蓋朕久不見之故忘之耳後三日宮車上賓矣先生為司業十有八年太學生數千人及天下賢士君子皆稱吳先生古道吳先生賢師而職銓衡者獨若不聞此雖先生之命而益以見其所守

且士大夫之重輕於世者亦豈係乎其官之進否也哉
先生篤孝友親喪哀毀骨立後在太學遇諸生告歸省
者輒感慟不勝處交友必輔之正道雖迂不避中允李
貫故同舍生素相厚實坐累繫獄十年家甚貧先生極
力調之且戒其家人有無相共貫竟死獄中而調其家
益勤平素施義類此一日會宴太學得風疾遽草畀歸
顧其子吾死勿用浮屠老子法治喪不一語及他業事
而卒之日家無一緡之儲禮部尚書蔚公集衆賻治飲

歸葬先生諱溥字德潤號古厓吳氏世業儒其先居臨川之種湖曾大父景南大父某父思清贅崇仁章氏遂家崇仁後以先生貴贈其父承德郎國子司業母章氏安人及封其妻鄭氏安人子男四與弼與疇與年與性人孫男三先生卒於宣德丙午九月三日春秋六十有四以卒之明年某月日葬崇仁左橋之原先生長士奇二年同官翰林者七年又以同鄉相交莫逆後來北京嘗主余家共夜坐談其貧賤時事蓋使人聳然起敬而

後知其操執峭厲蓋天性云無幾聞其訃余為儒林慟
之嘗私為作傳矣欲書一通寄其子未暇也今與性新
除休寧縣學訓導在北京求予作父墓銘遂損益傳文
為之誌而係以銘曰嗚呼先生君子之儒古道之趨古
人之徒其存者貞其執者確必有本原用淑來學豈世
無人誰與古心嗚呼先生足重儒林嗚呼先生逝矣不
作寒厓古栢高風凜若子與弼字子傳別號康齋天順
改元以高士徵至京授左春坊左諭德四上疏以疾辭

不就進封事十策英宗嘉納之遣行人王惟善送歸行
狀見後

明名臣琬琰錄卷二十三